

VENDIM
Nr.92, datë 15.2.2006

**PËR NGRITJEN DHE FUNKSIONIMIN E AKADEMISË DIPLOMATIKE PRANË
MINISTRISË SË PUNËVE TË JASHTME TË REPUBLIKËS SË SHQIPËRISË**

Në mbështetje të nenit 100 të Kushtetutës dhe të nenit 13 të ligjit nr.9095, datë 3.7.2003 “Për shërbimin e jashtëm të Republikës së Shqipërisë”, me propozimin e Ministrit të Punëve të Jashtme, Këshilli i Ministrave

VENDOSI:

1. Ngritjen dhe funksionimin e Akademisë Diplomatike në varësi të Ministrit të Punëve të Jashtme.

2. Akademia Diplomatike është qendra e trajnimit, kualifikimit dhe rikualifikimit, akademik dhe profesional, të të gjithë punonjësve të shërbimit me jashtë, punonjësve të institucioneve të administratës publike, të nivelit qendror apo vendor, institucioneve të pavarura, zyrtarëve të tjerë nga vendet e rajonit, dhe nga vende të tjera, në fushën e marrëdhënieve ndërkombëtare.

3. Akademia Diplomatike harton dhe zbaton programet arsimore të trajnimit, kualifikimit dhe rikualifikimit të punonjësve të shërbimit me jashtë dhe atyre të administratës publike, të nivelit qendror dhe vendor, apo të institucioneve të pavarura.

4. Akademia Diplomatike ka si detyrë të organizojë:

a) trajnime afatgjata formimi, me karakter akademik dhe profesional, për nëpunësit e sapopranuar në shërbimin e jashtëm, në mënyrë të veçantë, kurse dhe stazhe, si pjesë integrale të periudhës së provës, me një zgjatje kohore fillestare të paktën gjashtë muaj;

b) kurse afatshkurta për punonjësit e shërbimit me jashtë, të emëruar në përfaqësitë diplomatike, përpara marrjes së detyrës, duke i kushtuar një rëndësi të veçantë faktorit “gjuhë e huaj”;

c) trajnimin e diplomatëve, sipas gradave përkatëse dhe ndarjes modulare, të përcaktuar nga çdo drejtori. Ky trajnim është i detyrueshëm për të gjithë diplomatët, që shërbejnë në shërbimin me jashtë;

ç) trajnimin e të gjithë nëpunësve, që nuk bëjnë pjesë në shërbimin e jashtëm dhe emërohen në përfaqësitë diplomatike për nevoja pune. Trajnimi do të kryhet sipas gradave përkatëse dhe në funksion të detyrave, që do të mbulojnë këta nëpunës në përfaqësi;

d) trajnimin dhe ofrimin e ndihmës, akademike dhe hulumtuese, për të gjithë diplomatët, që përgatiten për marrjen e një grade më të lartë;

dh) trajnimin e zyrtarëve të tjerë, të administratës publike, të nivelit qendror apo vendor, dhe të institucioneve të pavarura, të cilët merren me marrëdhëniet me jashtë;

e) trajnimin e stafit mbështetës, sekretarë dhe asistentë, për çështje administrative dhe mbështetëse të diplomacisë;

e) trajnime për zyrtarë të tjerë, nga vendet e rajonit dhe vende të tjera, sipas kërkesës dhe nevojave, duke u bazuar në marrëveshjet përkatëse.

f) kërkime dhe studime me karakter akademiko-shkencor në fushën e marrëdhënieve ndërkombëtare, në lidhje me përparësitë bazë të politikës së jashtme të Republikës së Shqipërisë. Këto studime dhe hulumtime i dorëzohen Ministrit të Punëve të Jashtme, për të përcaktuar zbatimin apo jo të përfundimeve dhe rekomandimeve që dalin nga to.

5. Personeli i Akademisë Diplomatike përbëhet nga një staf prej 4 nëpunësish, që janë: drejtori i Akademisë dhe tre specialistë, të cilët do të merren me funksionimin dhe menaxhimin e plotë të saj.

6. Drejtori i Akademisë Diplomatike emërohet në përputhje me përcaktimet e bëra në ligjin nr.8549, datë 11.11.1999 “Statusi i nëpunësit civil”. Krahas kërkesave të parashikuara në ligjin “Statusi i nëpunësit civil”, drejtori duhet të jetë kërkues shkencor ose profesor universiteti, i diplomuar në degën e marrëdhënieve ndërkombëtare apo shkencave politike dhe të ketë, të paktën, një gradë shkencore. Specialistët e Akademisë Diplomatike emërohen po në përputhje me ligjin nr.8549, datë 11.11.1999 “Statusi i nëpunësit civil”. Të paktën njëri prej tyre duhet të jetë diplomat.

7. Pranë Akademisë Diplomatike vepron këshilli drejtues, i cili përbëhet nga: Ministri i Punëve të Jashtme, drejtori i Akademisë, një anëtar i Komisionit të Kuvendit për Politikën e Jashtme,

si dhe dy diplomatë karriere dhe dy personalitete nga fusha akademike e marrëdhënieve ndërkombëtare, të cilët emërohen nga Ministri i Punëve të Jashtme. Këshilli kryesohet nga Ministri i Punëve të Jashtme.

8. Këshilli drejtues harton dhe miraton kurrikulat e Akademisë, ndarjen e lëndëve dhe të degëve dhe modulet bazë për çdo nivel, përfshirjen e metodave të reja të mësimdhënies në Akademi, stafin mësimdhënës, donacionet e huaja për zhvillimin e Akademisë dhe detyra të tjera për funksionimin e brendshëm të saj.

Këshilli drejtues bën përzgjedhjen e pjesëmarrësve në kurs, siguron burimet njerëzore dhe materiale dhe kryen programimin didaktik të kurseve.

9. Akademia Diplomatike bashkëpunon me institucione homologe të vendeve të tjera, me universitete publike dhe jopublike, vendase dhe të huaja, për shkëmbim përvoja dhe për sigurimin e lektorëve, vendas dhe të huaj.

10. Veprimtaria e Akademisë Diplomatike mbështetet në rregulloren e posaçme, të hartuar nga këshilli drejtues dhe të miratuar nga Ministri i Punëve të Jashtme, në përputhje me legjislacionin që rregullon veprimtarinë e institucioneve të kësaj natyre në Republikën e Shqipërisë.

11. Efektet financiare për veprimtarinë e Akademisë Diplomatike përballohen nga buxheti i Ministrisë së Punëve të Jashtme dhe me donacione të ndryshme nga persona, juridikë dhe fizikë, vendas dhe të huaj, në bazë të marrëveshjeve përkatëse, në përputhje me legjislacionin në fuqi në Republikën e Shqipërisë.

12. Vendimi nr.198, datë 14.4.2004 i Këshillit të Ministrave “Për ngritjen dhe funksionimin e Akademisë Diplomatike pranë Ministrisë së Punëve të Jashtme të Republikës së Shqipërisë”, shfuqizohet.

13. Ngarkohet Ministria e Punëve të Jashtme për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha